

Inatsisartut isummerfigisassaattut siunnersuut Naalakkersuisut peqquneqassasut meeqqat atuarfiannut tulluussakkamik inuit pisinnaatitaaffii pillugit atuartitsissutissanik kalaallisut ataqatigiissumik sananissamik aammalu taassuma saniatigut suliniutigineqassasoq, meeqqat atuarfianni atuartitsisut inuit pisinnaatitaaffii pillugit ilinniartitsinissamut pikkorissarneqassasut

(Inatsisartunut ilaasortaq Nivi Olsen, Demokraatit)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut Inatsisartunut ilaasortaq Nivi Olsen, Demokraatineersoq, aalajangiiffissatut siunnersuutaanut qutsavigaat.

Naalakkersuisut siunnersuuteqartoq isumaqatigaat, inuit pisinnaatitaaffii pillugit atuartitsineq pingaaruteqartuummat aammalu meeqqat inuusuttullu akisussaaffitik pisinnaatitaaffitillu ilisimassamatigit. Qanoq iliuuseqarnissartik ilinniassavaat, namminneerlutik allalluunniit pisinnaatitaaffii innarlerneqartut misigigunikku. Taamaattumik inuit pisinnaatitaaffiinik, pingaartumillu meeqqat pisinnaatitaaffii pillugit atuartitsineq pingaaruteqartuuvoq. Inuit Pisinnaatitaaffii pillugit Siunnersuisoqatigiit tamanna pillugu inatsisit naapertorlugit pisussaaffiitut naapertuuttumik ingerlanneqarpoq.

Atuarfimmi nukarliit, akulliit angajulliillu alloriarfiini atuartitsissutini inuttut inerikkiartornermi inuiaqatigiilerinermilu ilikkagassatut anguniagassani inuit pisinnaatitaaffii ilaapput, sammineqartorlu pillugu ullutsinni ilinniutit assigiinngitsut pigineqarput. Kalaallit Nunaanni suliniuteqarfiit, soorlu MIO, Nakuusa aamma UNICEF, inuit pisinnaatitaaffii pillugit ilinniutinik atuarfimmi atugassanik ilinniartitsisumullu ilitsersuutitalinnik saqqummiussaqaqarnikuupput. Ilinniusiat Naalagaaffiit Peqatigiit meeqqat pisinnaatitaaffii pillugit Isumaqatigiissutaa aallaavigaat, Kalaallit Nunaannullu tulluarsagaallutik.

Taakkua saniatigut UNICEF-ip assersuutigalugu atugarissaarneq atuartunillu peqataatitsinermik suliani suliniut "Atuarfik Pisinnaatitaaffinnik Tunngavilik" ingerlappaa, Meeqqat Pisinnaatitaaffii pillugit Isumaqatigiissummik aallaaveqartoq. Kommunini assigiinngitsuni "Atuarfik Pisinnaatitaaffinnik Tunngavilik" ingerlanneqareerpoq, tamatumalu takutippaa kommunit sammisamik tassannga pingaarutilimmik isiginninniartut.

Qulequtaq inuit pisinnaatitaaffii Ilinniartitaanermut Aqutsisoqarfiup ilinniutinik saqqummersitsiviata, Ilinniusiorfiup, saqqummersitaani arlaqartuni aamma ilaavoq. Ilinniusiassat pillugit periusissiaq aallaavigalugu Ilinniusiorfiup nalilersortuarppaa, atuarfimmi ilinniusiat sorliit pisariaqartinneqarnesut.

Maannamut sammisassaq inuit pisinnaatitaaffii pillugit Ilinniartitaanermut Aqutsisoqarfiup ataani pikkorissaasoqarnanilu ilinniaqqinnernik ingerlatsisoqarsimangilaq. Taamaattorli kommunit atuarfiillu pikkorissaanernik ineriartortitsinernillu pisariaqartitaminnik saqqummiussisinnaapput, taamaalisooqareerpallu Ilinniartitaanermut Aqutsisoqarfik, Ilinniarfissuaq atuisullu suleqatigiillutik pilersaarusiussapput.

Inuit pisinnaatitaaffii pillugit atuartitsinermi piginnaasat ineriartortinnissaannik kissaateqartoqarpat, Ilinniartitaanermut Aqutsisoqarfik Ilinniarfissuarlu suleqatigiillutik kissaatit taakkua piviusunngortinniassavaat.

Atuarfik pillugu Inatsisartut inatsisaanni nr. 15, 3. december 2012-imeersumi § 36, imm. 1, nr. 3-mi aalajangersagaavoq, Naalakkersuisut atuartitsinermi ilinniutinik ineriartortitsisoqarnissaa pisussaaffigigaat. Ilinniutit suut saqqummersinneqarnissaannut aalajangiiniarnermi perorsaanikkut nalilersuinerit apeqquasaarput. Tamanna tunuliaqutaralugu Naalakkersuisut imaattumik allannguutissatut siunnersuuteqarput:

“Meeqqat atuarfiannut Kalaallit Nunaannut tulluussakkanik inuit pisinnaatitaaffii pillugit atuartitsissutinik kalaallisuunik ilinniusiorneq suli salliutinneqarnissaannik kommunillu suleqatigalugit meeqqat atuarfianni ilinniartitsisut inuit pisinnaatitaaffii pillugit ilinniartitsinissamut piginnaasaat qaffassarniarlugit pikkorissarneqarnissaannik Naalakkersuisut suliniuteqaqqullugit peqquneqarnissaannik Inatsisartut aalajangiiffissaattut siunnersuut”